



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa
19 Outobru 2015
Tribunál Distritál Dili

Provas la suficiente Tribunál Distritál Dili absolve arguidu krime violasaun seksuál

Iha 13 Outobru 2015, Tribunál Distritál Dili absolve arguidu JJS hosi krime abuzu seksuál ba menór tuir 177 (2) ne'ebé ministériu públiku akuza hasoru arguidu. Tribunál la hetan prova katak wainhira krime ne'e akontese lezada sei iha idade menór tanba lezada atinze ona idade 14 no lezada iha relasaun namora ho arguidu.

Tribunál mós konsidera katak arguidu ninia hahalok la prenxe elementus ba krime violasaun seksuál tuir artigu 172 (2) tanba la iha ameasa, obriga ho forsa no iha violénsia hasoru lezada. Kazu ne'e akontese iha Setembru 2014, iha Dili.

“Desizaun ne'e hato'o mensajem ne'ebé la-seguru no perigozu ba comunidade no enkoraja ema seluk atu aproveita frakeza iha Kódigu Penál aplikavel hodi kontinua komete krime hanesan iha futuru hasoru labarik fetu-ran sira. JSMP sente laran la-hakmatek teb-tebes ho desizaun ne'e tanba tribunál falla atu proteze joven fetu sira ho idade hanesan, ne'ebé dalabarak seidak iha koñesimentu adekuada ba relasaun seksuál sira hanesan ne'e,” dehan Luis de Oliveira Sampaio, Diretór Ezekutivu JSMP.

JSMP preokupadu teb-tebes ho tribunál ninia sensibilidade atu tetu no avalia profudamente kapasidade joven fetu sira bainhira sira iha situasaun ne'ebé vulnerável hanesan ne'e. Iha kazu ne'e, tribunál prova katak arguidu ameasa sei hakilar lezada iha nia família sira, baihira lezada la sai mai hasoru arguidu. JSMP fiar katak, iha situasaun ne'e, bele sai presaun ida todan ba lezada ne'ebé emocionalmente la maduro atu simu no maneja presaun hosi arguidu. Aliende ne'e tribunál mós falla atu konsidera arguidu nu'udar ema kaben na'in ida, bele uja kualker maneira atu abuzu lezada nia inesperensia iha relasaun hanesan ne'e.

Mezmu tribunál konsidera lezada iha ona kapasidade atu bele hateten la'e ba arguidu, JSMP hanoin katak lezada seidak iha koñesimentu ne'ebé di'ak no suficiente kona-ba impaktu hosi relasaun seksuál.

Aleinde ne'e, wainhira tribunál hetan katak lezada sei iha idade tinan 14, tribunál tenke altera artigu sira iha leten no akuza no kondena arguidu tuir artigu 178 Kódigu Penál kona-ba aktu seksuál relevante ho ema adolsente sira ne'ebé atinze ona idade tinan 14 to'o 16. Pena másimu hosi krime ne'e mak tinan 5 prizaun. JSMP fiar katak se tribunál altera (uja) artigu ne'e, arguidu sei simu pena ne'ebé apropiadu.

Iha artigu 178 Kodigu Penal define katak, ema maiór ne'ebé, iha situasaun ne'ebé la tama iha seksaun ida-ne'e nia previzaun, prátika aktu seksuál relevante ho labarik tinan 14 too 16, tanba abuza nia inesperiénsia sei hetan pena prizaun too tinan 5.

Iha parte seluk, JSMP konsidera situasaun ida ne'e sai hanesan referencia ida ba Parlamentu Nasionál (PN) atu tenki toma konsiderasaun sériu ba iha submisaun JSMP no ALFeLa kona-ba alterasaun Kódigu Penal ne'ebé JSMP apresenta desde inisiu 2015. Iha submisaun ne'e, JSMP no ALFeLA rekomenda ba PN atu alterna Kódigu Penál no inkorpora artigu espesífiku ida kona-ba inestu no propoin armonizasaun ba provizaun legál ne'ebé relevante kona-ba ofensa seksuál ba menór.

JSMP no ALFeLA mós rekomenda ba PN no Ministériu Justisa hodi konsidera provizaun lubuk ida iha Kódigu Penál Timor-Leste ne'ebé define inkonsistensia kona-ba idade minoridade iha Timor-Leste. JSMP hanoin katak importante teb-tebes atu aseguira konsistensia hahú hosi artigu 1 Konvensaun Direitu Labarik, artigu 118 no 126 hosi Kódigu Sivil ne'ebé define katak idade minoridade iha Timor Leste mak sira ne'ebé seidakompleta tinan 17.

Ministériu Públiku akuza katak, iha 08 Agostu 2014, arguidu liuhosi iha facebook haruka mensajen ba lezada atu hasoru malu iha terminal. Maibé lezada lakohi sai. Tuir-mai iha 09 Agostu 2014, arguidu manda mensajen ameasa sei ba hakilar iha lezada nia uma, sekuandu lezada mantein lakohi hasoru arguidu. Tanba ne'e, lezada sai ba hosoru arguidu no arguidu tula lezada ba iha arguidu nia kolega ida nia uma no ba halo relasaun seksuál ho lezada. Depois ida ne'e, arguidu ho lezada kontinua halo relasaun seksuál hamutuk dala 10 iha arguidu nia kolega nia uma iha tempu ne'ebé la hanesan.

Julgamentu ne'e prezide hosi juis koletivu kompostu hosi Dra. Jumiati Soares Freitas, Dr. Antonio do Carmo no Dra. Maria Solana. Entretantu Ministériu Públiku reprezenta hosi Dr. Reinato Bere Nahak no arguidu reprezenta hosi Dr. Abilio Tavares hosi Defensoria Públiku.

Atu hetan informasaun kle'an favor kontaktu direktamente:

Rua setubal, Colmera, Dili Timor Leste
PoBox: 275
Telefone: 3323883 | 77295795
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org

Rua setubal, Colmera, Dili Timor Leste
PoBox: 275
Telefone: 3323883 | 77295795
www.jsmp.tl
info@jsmp.minihub.org
Facebook: www.facebook.com/timorleste.jsmp
Twitter: @JSMPtl